



J. B.-CLIQUE SANTIANS
Aiti Garde

Hippie, Hippie Jeeh – 60 Joor BRAVO

Wo mir no jung gsi sinn, hämmers noonig so gwoggt,
Well mir nit gwisst hänn, wie me richtig umenanderbogg,
Hesch gmaint, wenn de em Klärli e glains Schmitzli gisch,
Die emänd wääge dämm grad schwanger isch,
Niemerts het uns gleert, wie me bim Sex ka verhiete,
Die Alte reede jo nur vo de Biinli und de Bliete.
Do isch s BRAVO mit em Doggter Sommer uusekoo,
Dangg dämm kenne mir ändlig s Lääbe verstoo,
Mir hänn jetze tscheggt, wie me's muess mache und mit waas,
D Maitli wänns au wisse, nämme d Pille und gänn Vollgaas,
Me hipft vo Bett zu Bett, me loot kaini uss,
Mir mache uns e riise Gschpass doo druss,
Wär zwaimool mit der glyyche pennt,
Isch verglemmt oder het sich eeländ verrennt.
Die Freiheit isch gränzeloos, s fägtt alli Daage,
Vo der Erwachsene leen mir uns nyt me saage.
Trotz Doggter Sommer hämmer aber Soorge,
S Klärli isch wirgglig schwanger woorde,

Der middleri Dail vom BRAVO kasch uuse schnyyde,
Und die Einzelbildli mit Lyy m uffenander byyge,
Zumene Lääbensgrosse Bild vom Elvis oder der BB,
Bi dääre kasch – s isch doll – der halbi Schoppe gsee.

Speeter hogge mir uff de Tramschiine zem demonschtriere,
Glyychzytig dien d Ziircher iire Globus demoliere,
Denn was die Alte bhauptete macht fir uns kai Sinn,
Well das jo schliesslig alles Gruftis sinn,
Styyre zaale und der ganz Daag schaffe,
Und eewigs ummeschupfe loo, dasch nur fir d Affe,
Ass mir das sotte mitmache, kasch grad vergässe,
Uff Bonze, Schugger und Vietnam sinn mir nit versässe,
Dorum gheert jetze e neyi Wältoornig aane,
Aini wo mir, und nit die alte Duuble blaane,
Mir drampe druss, wärde Hippies und Bluemekinder,
Mir wänn nur no das aifache Lääbe vo de Inder,
Arafat, Ho Chi Min und der Che sinn unseri Idool,
Bim Guru und bim Kiffe, saage mir em Schtress lääbwool.
Uff dää Alldaag vo unsere Alte hämmer null Bock,
S Nirwana vo uns Hippies haisst Peace und Woodstock,
Janis Joplin und der Jimi Hendrix nämme mit Gnuss,
Heroin und Koks, und setze sich dermit der goldig Schuss,
Piff, paff, puff und die sinn duss,
Mit dääre iirer Muusig isch fir immer Schluss.

S Lääbe goot trotzdämm witter und holt uns yy,
Uffaimool bigryffsch, as de sottsche erfolgrych syy,
Mit Hippie spiile schtsosch aa, kunsch nimm wyter,
LSD, Gassekuchi und Kiffe macht s Lääbe schyter,
Drum hämmer die Hippie Wält wiider vergässe,
Und sinn nur no uff Stutz und Karriere versässe.

Die hittige Junge dien nimme Motze und Revolutioniere,
Si dien iir Lääbe agzeptiere und nit demonschtriere,
Si sinn nimme Hippie oder Punker, Rocker oder Dandy,
Die glotze nur no uff iir Handy.